

摘藻堂四庫全書薈要

集部

欽定四庫全書薈要

集部

明詩綜卷四十九



詳校官編修臣汪鏞

欽定四庫全書薈要卷二萬五百二十二

集部

明詩綜卷四十九

翰林院檢討朱彝尊編

徐學謨一首

學謨初名學詩字子言更字叔明蘇州嘉定人
嘉靖庚戌進士授禮部主事歷郎中出知荊州
府遷副使擢僉都御史撫鄖陽召拜禮部尚書
加太子少保有海隅春明二稿

靜志居詩話宗伯本名學詩以與劾分宜者同
姓名遂更為謨昔杜欽損目人斥為盲鄴惡其
同字遽自稱疾猶見詆於當時若宗伯更名乃
屬患失百世而下知有直臣陳孟公之名遵何
必驚坐諱哉宗伯雅負詩
名然多懦響殆肖其人

白螺行

風吹巫峽江水大何者一螺當江坐勢壓水口抵蓋崩
沙脊嶙峋橫伏馱螺邊人家泛估船得魚買鹽撐日過
去年水淹車水堤滿縣漂衝失耕作官府有差無處派
翻視白螺為奇貨紛紛下帖迎上司白日索夫夜巡邏

可憐殘子苦無皮忽聞使者收門課門既有差地有租
此額更從何處科生血迸地不得收爺娘妻子忍遷播
輸錢猶可輸命難偏側乾坤幾穩卧魯門爰居知避災
眼前世事堪一唾老蛟跋浪白鱣泣賤夫只恐滄江破

王好問二首

好問字裕卿樂亭人嘉靖庚戌進士歷官南京
戶部尚書贈太子少保有春照軒集

春江曲

春風度江城四山漾新綠江頭蕩舟人載酒過江曲少
婦白苧歌風吹斷還續春鳥似相依雙雙沙上浴

幽居

幽居少煩慮愛此屋上山嘉木蔭方池流水常潺潺東
風弄晴和好鳥鳴關關觸目若有得撫景心自閒
廣成子望望不可攀

劉效祖

四首

效祖字仲修濱州人嘉靖庚戌進士除衛輝推

官徵授戶部主事歷員外郎中出為陝西按察

副使有雲林稿

朱中立云仲修詩沈著渾雄得盛唐氣格李伯承之亞也

詩話副使負經世略坐計吏罷官晚寄情詞曲
所填小令可入元人之室如沈醉東風云東華
路塵沙滾滾玉河橋車馬紛紛官高休羨榮命
蹇須安分靠青山紫閣柴門間把英雄細討論
能幾個到頭安穩又一闕云門巷外旋栽楊柳
池塘中新浴沙鷗半灣水繞村幾朵雲生岫愛
村居景致風流閒啜盧仝茗一甌醉翁意何須
在酒朝天子云喜碧山日親把銀魚早焚銷繳
了功名分輶車鳩杖鹿皮巾也不讓黃金印晚
景無多前程休問趁閒時自在隱尋幾個故人
團坐在華門嘗則把陰晴論雜之小山樂府中
不能辨也昭陵嘗遣中使索其題冊呼曰念菴

念菴副使別字也因賦詩云更生雙鬢已蕭騷
敢謂文章擅彩毫過誤偶承明主問因緣不是
鬱輪袍都人傳其事以為列朝
所未有詩亦爽豁惜集不傳

甕山耶律丞相祠作

迢遞荒山下披榛拜古祠
雄疆稱扼塞壯志在匡時
溪遠泉聲細林深日影遲
黃沙空一望誰與問荒碑

燕京歌

元會初分庭燎光君王親御紫霞觴
不知五夜春多少
白日猶聞蠟炬香

塞上曲

龍沙近接古檀州多少從軍倚戍樓
寒夜不堪愁絕處西山片月挂城頭

九日獨酌

南山遙對菊花開欲采無人為舉杯
縱說柴桑貧謝客何曾不許白衣來

張四知一首

四知字子畏汝陽人嘉靖庚戌進士除刑部主

事轉兵部郎中出為四川按察僉事有韶亭集
上已送陳子韶赴浙東僉憲

暮春燕地草萋萋冠蓋追隨漢苑西尊酒不須臨水泛
宮鶯已聽隔花啼風流遠媿山陰客麗藻新傳上已題
況是河梁明日別離裾莫惜暫相攜

陳宗虞一首

宗虞字于韶閬中人嘉靖庚戌進士歷官按察

副使有卧雲樓橐六亭集

穆敬甫云陳君詩過於激烈

送胡生南歸

揚子江風落暮潮
瓜洲夜月起蘭橈
西湖歸去三千里
家在芙蓉第一橋

翁夢鯉一首

夢鯉字希登莆田人
嘉靖庚戌進士有雨川集

次忻州

故園杳無際
淒然客思多
雪中歸代郡
冰上度滹沱
野戍孤煙出
寒空一鳥過
邊庭誰與晤
獨賦式微歌

陳柏一首

柏字子堅沔陽州人嘉靖庚戌進士歷官按察副使有蘇山集

送正卿弟之黎平

匹馬迢迢渡五溪雙旌遙指夜郎西莫憎遠道猶千里
隨處花開更鳥啼

田汝麟

麟二首

汝麟涿州人嘉靖庚戌進士

燕啣泥

燕啣泥巢君屋不食君家米與鹽但借君家梁上宿胡
為閉門相棄逐

遊空同山歌

空同山乃在涇水之南太白西危峰峭壁與天齊上有
栖雲千尺之幽洞下有迴流萬折之深谿煙岑古木渺
無際虎豹鼯鼯白晝啼憶昔軒轅帝問道廣成子煮銅
荆山下鍊藥鼎湖裏道成騎龍飛上天空留元鶴巢雲

煙元鶴招之不可得翩翩四萬八千年我來空同尋仙
跡欲索玄珠遊無極塵海茫茫何處求山寒日夕天空
碧

方宏靜一首

宏靜字定之歙縣人嘉靖庚戌進士累官南京

戶部右侍郎

王仲房云定之祖法盛唐而於王孟尤近若流水不知處幽禽相與

飛不知春色減忽見林花飛永日空山寂幽然時一吟宛然二君遺響也

東巖

巖端曙日輝巖下啓松扉流水不知處幽禽相與飛青
山長對席白髮久忘機試與西鄰叟攜壺上翠微

樂尚約一首

尚約字孔源膠州人嘉靖庚戌進士由溧水知
縣選授江西道御史謫安州判官遷懷慶推官

被論削籍

詩話孔源宮詞不
失溫柔敦厚之教

宮詞

玉簫吹斷落花香空結流蘇五鳳凰不遣和戎即恩幸
敢矜顏色過昭陽

馮皋謨一首

皋謨字明卿海鹽人嘉靖庚戌進士由刑部郎
中出為江西按察僉事歷廣東參議副使福建
左參政有豐陽集

泊鴛鴦湖遲友不至

野客饒春興輕舟坐夕曛湖光天下上暮色水氤氲戍

鼓連城動漁歌隔岸聞參差吹未已獨立望夫君

潘季馴一首

季馴字時良號印川烏程人嘉靖庚戌進士除
九江推官擢江西道御史升大理寺丞歷少卿
以僉都御史治河累官南京兵部尚書罷歸起
刑部尚書加太子少保總理河道有留餘堂集
詩話印川自嘉靖乙丑受命治河至萬歷庚辰
工成著有宸斷大工錄先後四總河務晚輯河
防一覽其大指謂通漕於河則治河即以治漕
會河於淮則治淮即以治河合河淮而同入於

海則治河淮即以治海立意在築隄束水借水
刷沙以此秦功百年以來俱守其規畫可謂能
捍大患者獨怪天啓初補謚列朝名
臣而公獨不與焉錄其詩為之歎息

除夕

行到海窮處仍驚歲盡時
燈前誰共影愁裏強吟詩
游子歸何日芳春坐可期
滿城簫鼓動客思已淒其

梁夢龍一首

夢龍字乾吉真定人嘉靖癸丑進士改庶吉士
累官吏部尚書加太子太保贈少保謚貞敏

宿三川驛

寂寞三川驛風塵苦見侵
王程方未已客夜且高吟
山火延危嶺泉聲聒遠林
幽懷良不淺何日慰招尋

曹梅一首

梅字子和鹽山人嘉靖癸丑進士官郎中

沅州道中

亂山盤錯入沅州
瘴雨蠻煙動客愁
回首燕南家萬里
斜陽誰倚故園樓

孫應鰲一首

應鰲字山甫貴州清平衛人嘉靖癸丑進士歷
官南京工部尚書贈太子太保謚文恭有學孔
堂藁

華山雜咏

玉女窗開眼倍明仙童肅隊奏鸞笙海雲初散蓬萊股
人在蒼龍背上行

王一鶚一首

一鶚字子薦曲周人嘉靖癸丑進士歷官太子少保兵部尚書有春陵集

三月晦日

花外東風送馬蹄平原一望艸萋萋黃鸝苦欲留春住
深樹斜陽到處啼

張 翀 三首

翀字子儀柳州衛人嘉靖癸丑進士歷官兵部右侍郎天啓初追贈尚書謚忠簡有鶴樓集

別貴竹諸友

十年與君遊千里與君別把袂意不言含杯氣欲絕漸
隔瀟湘雲空留夜郎月一曲瑤琴彈知音對誰說

登焦山夜歸

短棹乘風去輕輿帶月歸花香入徑細漁火隔江微遠
寺猶聞磬荒村半掩扉石橋橫渡處醉看海雲飛

有懷

五落龍山葉三來鴈足書夢中親舍近天外故人疎寥

濶乾坤裏疎狂醒醉餘秋風吹短髮溪畔獨躊躇

龐尚鵬一首

尚鵬字少南南海人嘉靖癸丑進士除平樂知縣入為監察御史歷官右副都御史巡撫福建天啓初追謚忠敏有百可亭摘橐

詩話少南視醞兩浙總理兩淮長蘆鹽屯身處脂膏不能自潤集中虛室行云細視餅中久無粟舉火終朝待鄰曲長饑近午始一餐敢望豐年收萬斛自注三月中旬已貸粟矣即此亦是難得

秋日園居

物候隨時變那堪問歲華晚風三徑竹朝雨半籬花自
比禪居靜從教物論譁浮生何所有醉處便爲家

吳時來一首

時來字惟修仙居人嘉靖癸丑進士歷官右都
御史掌院事卒謚忠恪有梧齋集

焦山夜歸

古寺探幽去山城倚醉歸留人林月上醒酒暑風微漁

唱搖江渡村燈照夕扉獨憐沙上鳥已宿尚驚飛

楊綵一首

綵字質夫虎賁右衛人嘉靖癸丑進士歷官右
僉都御史巡撫山西

雁門述懷

昔稱雁門郡嵯峨抱萬山樓煩隱天際滹沱水潺湲寒
沙慘白日北風摧朱顏封侯詎非願王事顧多艱丈夫
志四方茲游何時還

李 袞 六首

袞字于田內鄉人嘉靖癸丑進士選庶吉士除
簡討遷南京禮部郎中歷官提學副使有太史

集

詩話于田博洽中州人以擬楊用修而歸田之
後縱情聲伎放誕不羈女優登場至雜伶人中
持板按拍主人知而延之上坐恬然不為怪及
去借主人櫪上馬挾女優連騎而去此其狂態
更甚於用修矣詩亦少
深思絕句頗強人意

懷姚叙卿謫居

自從東郡別君侯
吳楚茫茫悵遠遊
故國鶯花牽客夢
大江風雨動人愁
偶緣散吏調琴鶴
無復題詩上酒樓
驛騎蕭條山海隔
逐臣心事兩悠悠

嘉靖宮詞

四首

沈水龍涎徹夜焚
桂宮芝館結祥雲
壇前纔布諸天位
苑外先催學士文

玉貌終年侍禁闈
每逢時節賜金緋
君王不愛纖腰舞
裁作雷壇拜斗衣

小車飛曳向玄都翠羽金翹笑自扶玉螭樹邊長日市
內璫爭買大秦珠

泥金檢玉祝長生萬國封章止進呈月滿西宮更漏永
九重風落步虛聲

都城雜詠

西宮白日靜波流小殿玲瓏夾御溝花樹重重春爛熳
遊人偷上洗妝樓

徐師曾一首

師曾字伯魯吳江人嘉靖癸丑進士選庶吉士授兵科給事中歷刑科左給事有湖上集

詩話伯魯說經鏗鏗又輯文體明辨以迪後學一官清要五疏乞歸其述志賦云相先民之不朽兮托三事而流傳吾何有一於茲兮死速朽而猶慙惜青春之不我與兮忽已至乎衰年胡不及時以精進兮擇可修而勉旃昔賢有言耄耋未至惛衰不及頓尚可厲志於所期又言進不及達退無所矯伯魯之謂矣詩亦清婉蓋斤斤學唐者

宿磚河驛

渡頭風色晴漁火隔沙明帆逐暮雲落潮隨春水平長

蘆昨夜月甲馬舊時營關隘今無事稀聞擊柝聲

顧曾唯一首

曾唯字一貫吳江人嘉靖癸丑進士除金華知縣擢浙江道御史巡按廣西引疾歸有閩越雜

咏

同賓峰集我渡山房

旅客貪呼伴芳尊共解顏清池來浴鳥高閣俯重山墮

酒松花細抽梢竹筍斑

一作當軒
蘿月閒

夷猶二三子竟日不

知還

姜子羔 二首

子羔字宗孝餘姚人嘉靖癸丑進士除成都府

推官入為禮部主事終行太僕卿

黃太冲云太僕幼侍王文

成講席不與詩人爭一聯半句之工然俊爽之氣涌出行墨之間不可掩也

登峨嶺絕頂吟

君不見大峨之山矗西土乃在軒轅之臺列仙之府我
騎飛龍叩天戶九州歷歷皆可數初由平陸瞻青冥丹

梯翠磴愁攀登亦鳥伸而猿引斯颺舉而雲升下視大
壑不知其幾萬仞惟見長蛇尺蠖挂絕壁之蒼藤攀危
歷險趣未畢積雪陰風轉蕭瑟初疑雲自石中生寧知
日向雲間出普賢巖前雲日晴圓光倒照何熒熒曄然
五色相照耀有若虹蜺跨海掩赤城是非山澤氣無乃
陰陽精須臾雲散日西走光亦隨雲隱巖口對此喜極
心神舒聖燈又出南山隅初看一炬何趑趑少焉萬簇
皆東趨神奇鬼怪事殊絕銀燈火樹焉足娛歸來作歌

但坐嘯還問山靈有意無

下巖寺

一入招提境登臨思已牽地將金作界山以玉為泉僧
定魚皆出江空月自懸虛巖尊者象幻跡至今傳

鄭茂一首

茂字士元莆田人嘉靖癸丑進士除海鹽知縣
擢兵科給事中歷官河南按察使

過艸萍驛

古驛荒煙斷征驂向晚停吟回江雨白坐對越峰青萬
事皆蕉鹿吾生亦艸萍勞歌猶未已短缺復衝星

林 命一首

命字子順建安人嘉靖癸丑進士歷官廣東按
察使有陽溪集

遊定惠院和韻

言尋僧舍出東門紫菊黃橙處處村秋盡遠峰含翠靄
天寒斷岸落潮痕山中花謝臺空在亭上詩成酒續溫

不見美人湘水畔
數聲漁笛欲消魂

季科三首

科字與登江陰人嘉靖癸丑進士除行人選授
禮科給事中出為江西布政司參政有雪浪閒

居二橐了菴鷗盟錄

詩話與登歸田之後田產所入悉以築圃圃在
萬壽山麓中有六曲徑蒼雪嶺賜閒堂雪浪湖
湖中有青螺墩妙高閣湖上有寄寄堂紅雲閣
華陽洞天又鑿洞為小桃源中有赤城樓來鶴
亭桃花泉曲水亭雲林桐江片石恒與朋
舊鵷咏其間足稱好事詩亦安整不佻

太保顧惠巖公祇役泰山途次和答

紫極傳丹詔青霄訪玉華
霓旌翻日觀瑤島接星槎
寒蹋峰頭雪晴攀海上霞
翩躚雙白鶴遙駕五雲車

次韻答鄧薇山社長

祖席分襟地江關積雪天
寧知廬阜約翻上汶陽船
夢斷清秋半書來白鴈前
心期渺流水虛奏伯牙絃

曲水亭

飛瀑雲中響清觴石上浮
蘭亭還我輩不減晉風流

侯 祁一首

祁字應文鄆城人嘉靖癸丑進士歷官

缺

知

府

浮圖峪

雄關北峙萬山中天外浮圖接太空白馬遠從青海入
紫臺高與碧雲通秋風沙塞寒煙暝古戍旌旗晚照紅
自是聖朝無戰伐漢家不數貳師功

劉 侃一首

侃字正言京山人嘉靖癸丑進士由戶部郎出
為知府有新陽館集

隴西雜興

西極秋高白鳥翻憑闌送目到河源久無槎影通銀漢
遙見天光下火敦青海風濤還積石玉門車馬半中原
崑崙故是征西路寄語山前吐谷渾

盛周一首

周字文郁秀水人嘉靖癸丑進士除知浦城縣

入為刑部主事歷郎中出知東昌府

詩話太守少從王龍溪遊與沈先生靖夫講學于聞湖書院遺址在梅家蕩水中央其子姓至今聚族于斯聞其報最日忤分宜父子不得臺諫蓋莊士也

蔡見麓過夜坐

南浦停車暝色催故人相見且銜杯月明何處吹長笛
落盡空山幾樹梅

王可大一首

可大字元簡吳江人嘉靖癸丑進士台州知府

有懸筒集

宮詞

承明殿裏諫章來封事君王次第開此日昇平邊圉靜
日斜猶自在平臺

史起蟄一首

起蟄字德龍江都人嘉靖癸丑進士

江上

溪雲窈窕海天晴檻外江流似掌平午夢醒來無一事

水雲亭上看潮生

吳文華一首

文華字子彬連江人嘉靖丙辰進士累官南京
兵部尚書贈太子少保諡襄惠有濟美堂集

謁岳武穆祠

幾樹蕭森岳廟東一杯懷古酹西風
凱歌竟負黃龍飲信誓虛傳鐵券功
無復翠華回絕漠最憐白鴈入行宮
神州恢復千年恨讀罷遺詩恨未終

方九功一首

九功字允治南陽人嘉靖丙辰進士歷官南京

工部右侍郎有息機堂稿

歐楨伯云允治詩嚴整夷暢范介孺云

允治音節清亮意趣雋永獨超物外不習一綺麗語

泊滄州有感

世事看流水漂零見此身他鄉猶是客失路竟依人樹
引長堤暮花殘故國春卷簾聊對酒幽寂恐傷神

周詩一首

詩字興叔錢塘人嘉靖丙辰進士歷官通政使
有與鹿集

赴天津

仲夏衆芳歇沃野羣卉稠曜景窮北陸薰風獻南陬伊
余赴期會東驚戒方舟晴雨遞昏晝涼燠變絺裘滌洄
見湖澳寂歷懷滄洲結髮事明主策勲慕前修名賤業
匪建時往命不猶才將世途左道與隱者謀漆園修達
生柱下崇致柔優哉聊卒歲庶以謝愆尤

胡直二首

直字正甫泰和人嘉靖丙辰進士除刑部主事
出為湖廣按察僉事歷四川布政司參議乞休
起補湖廣提學副使陞廣西左參政歸有衡廬

精舍藏橐

孫山甫云正甫胸次洞然有物我同
體之懷故其詩暢而鬱直而婉天趣

獨深非追
琢可及

登衡嶽

弱齡慕遐舉中為世網嬰雖抱及物志而非濟時英家

本衡廬交早負泉石盟秉憲涉湘沅吏事滋牽縈靈岳
莫疆域渺若隔蓬瀛恭承帝新命駕言自西征迴車恣
探歷使我夙心傾朝暎蕩雲嶽導我游上清吾衰疲塵
鞅學道未有成安得同心友眷言事耦耕

龍洲

窈窕繁花路清虛野甸居漸為逃世客嬾答貴人書水
閣依鷗鳥塵編信蠹魚日尋垂釣侶長到月月初

張潛一首

潛字用昭華州人嘉靖丙辰進士除戶部主事
轉員外改禮部歷郎中出為廣平知府陞山東
左參政有東谷集

送邃菴相公巡邊

羽書昨夜入甘泉朔漠流沙起塞煙
遂使至尊親授鉞
遙煩上將出巡邊
望隆數入論思地
寄重三持節制權
諸鎮安危憂不細
宵衣應待凱歌旋

黎民哀一首

民衷字惟和從化人嘉靖丙辰進士歷官吏部郎中出為廣西參政

月夜吳舍人過集

向夕羣愁起幽期幸不迷
天垂鵲鵲外城轉鳳凰西
翠暈淹宮漏春星散馬蹄
十洲飛夢遠何路問丹梯

姚汝循六首

汝循字叙卿上元人嘉靖丙辰進士除杞縣知縣遷南京刑部郎中出知大名府謫嘉州知州

有錦石齋集

詩話叙卿詩格不高然五古遠倣陶韋近體能
宗大厯此益藩黃南道人入之李何諸公之列
目為盛明
十二家也

夏夜對月

落日暑暫歇微風蕩靈襟
塵淨庭宇竹樹森繁陰皎
月牆東來照見石上琴揮
手一再鼓悠然生遠心鍾
期久不作千載誰知音

秭歸立秋

晷運相推斥昨夏今已秋元蟬鳴不歇大火莽西流人
生寄一世漂如波上漚乃為一尺組而來萬里遊琴書
委不理與言非故儔曉起戴星行入夜尚不休勞勞寡
懽悰戚戚增煩憂短景易以邁茲歲且復周功名建何
時霜華欲滿頭自不堅始願及此將誰尤

自橫梁放舟還郡

解纜橫梁渡鳴橈濯錦川秋山初過雨夕漲欲浮天四
野明殘照孤城合暮煙媿無仁者政竹馬亦橋邊

半峰禪院遲同遊諸君

策杖款禪扃垂藤交古路却顧後來人蒼蒼隔煙霧

回鴈峰

回鴈峰頭望帝京寒雲黯黯不勝情賈生已道長沙遠
今過長沙又幾程

巫峽書所見

巫山萬仞鬱嵯峨巫峽嘈嘈湧白波多少行人齊下淚
漁郎猶唱竹枝歌

施篤臣一首

篤臣字敷甫青陽人嘉靖丙辰進士官至順天

府尹

社日沽頭作

蕭蕭沽城東累累陌上墓埽除骨肉稀含淒當古路墓
上車馬喧墓中人不寤撼撼白楊枝怪鴟啼無數人生
若流水一去誰迴顧形骸草木姿詎比金石固往者何
足歎來者將焉措驅車此彷徨擬續招魂賦

卞錫一首

錫字叔孝嘉善人嘉靖丙辰進士除中書舍人

選吏部稽勲主事有豹山集

陳仲醇云分宜柄國言者以蚍蜉撼

樹不勝者止司勲往往抗其盛氣方袖封章彈之適聞親訃還里故其居恒所為詩聊蕭不平

感慨畢露

曉舟即事

野寺侵雲出千家草色勻晚風吹浪白夜雨濕苔新去
鴈聲何急當樓鼓尚頻回看煙樹合殘月下城闌

鄭洛一首

洛字禹秀安肅人嘉靖丙辰進士除登州推官
遷廣東道御史累官少保兵部尚書兼右都御
史贈太保諡襄敏

冬夜獨坐

天涯歲暮夜淒淒鼓角初傳月已低
一榻悠然成獨坐不知身寄玉關西

曾同亨一首

同亨字于野吉水人嘉靖己未進士累官太子
太保南京吏部尚書謚恭端有泉湖山房集

贈趙大參赴山西

雁門關外羽書飛帝念西征數解衣邊徼鼓鼙渾未歇
人家煙樹覺全稀無煩兵法儲行橐自請長纓出禁闌
十二屯田方略在策勲看拜徹侯歸

魏時亮一首

時亮字敬吾南昌人嘉靖己未進士以兵科左

給事使朝鮮累官南京刑部尚書

平壤拜箕子墓并訪井田遺跡

禹範留西土先生獨向東道無浮海歎義與采薇同舊
井存殷畫尋冠尚古風荒丘平壤外麥秀想遺宮

沈節甫一首

節甫字以安烏程人嘉靖己未進士累官工部
左侍郎贈右都御史謚端靖有太樸集

題且住軒

此邦非吾鄉此室非吾廬情知非久客且復卜其居蕭
蕭環堵中俯仰欣有餘天地為逆旅百年亦須臾羲娥
無停轂吾生自有初念此坐長歎秋風起庭樗飄蓬任
回飈素位恒晏如

張 鹵一首

鹵字召和儀封人嘉靖己未進士歷官右副都
御史巡撫真定改大理寺卿調南京太常寺卿
得張嵒崧銅梁書

萬里蠶叢寄一書開緘涕淚滿衣裾可憐話別六年後
同是招魂九死餘事過始諳渾失計眼前莫更問何如
寒灰老我冥心定汴水河干已結廬

沈奎一首

奎字文叔江陰人嘉靖己未進士除戶部主事
歷郎中出為浙江按察僉事分巡嘉湖遷江西
布政司參議有歸興集

富春

雨後衆山青汀邊雙鳥白挂帆趁西風遙看富春驛

沈啓原 五首

啓原字道升秀水人嘉靖己未進士歷官陝西
按察副使有鷄園艸

項里西楚霸王廟

符命通神契天心屈霸圖風雲空叱咤陵廟且榛蕪悔
失師中范徒憐帳下虞江東餘父老伏臘走村巫

同劉教授羅訓導再過福昌寺赴縣尉祝子餞

為踐東林約相要竹裏行升堂秦博士倚席魯諸生吏
道空馳傳賓筵再鼓笙不緣仙尉引誰共冶遊情

懷陸仲長

京洛追遊處春風次第吹官從一命始別是隔年期藥
裏趨中禁方書得上池正逢欣賞日未許動鄉思

謁宋真宗廟

玉輦巡游處荒亭半綠苔攀號龍已去瞻禮客重來漢
時空遺蹟秦封亦有臺何如恭己日稽首咏康哉

冬日偕袁池南楊完愚陳夔石饒廬外山鄉丈於
靈應觀觴咏移日

飲餞離亭日半黃飛雲落葉對清觴江山去住皆陳迹
賓主東南是故鄉翠竹含風仙院靜白蘋牽浪楚天長
追攀未盡登臨興野水寒禽又夕陽

錢鎮四首

鎮字守中烏程人嘉靖己未進士官兵部郎中

有淡菴集

許孟中云淡菴
詩冲逸似陶韋

詩話守中從唐子鎮講學居弟子之首而詩無
陳腐之習中年卜宅思溪掘地得宋王觀察永
從墓亟掩之而築堂其上不以為忌也永從嘗
刊五代史纂誤雜錄二書置本郡庠後取以補
監本見陳氏書錄解題今思溪土人不復
有知其姓名者矣錄守中詩附識於此

餘不前溪

茗水從南來真源自天目始出纔涓涓蛙跳雀可浴東
風桃花水一夜高於屋百里下吳興一汎更一曲青山
浮水面處處居可築艸玄伊誰亭名花間疎竹自昔稱
餘不佳名豈虛辱

山中雜興

結廬傍青山，繩樞瓮為甕。
生涯陌上桑，行逕門前柳。
獨行媿踽踽，顧盼無與偶。
策杖求友生，陶潛去我久。
豈伊逃醉鄉，翻念魯中叟。
寂寞柴桑間，寄意千載後。
廬山舊遊路，往跡今已朽。
古今諒同轍，悵望一搔首。

新晴散步

自啓郊扉曳履行，傍溪雲日放初晴。
新篁拔地已數尺，黃鳥隔林時一聲。
老去任情忘檢束，客來廢禮闕逢迎。

家臨西塞清溪口坐看桃花錦浪生

田家雜興

細艸行來芳徑修
篁覆處茅菴借
問丈人生計薄
田自種溪南

張祥鳶六首

祥鳶字道卿金壇人嘉靖己未進士除戶部主
事歷員外郎中出為河東運司同知遷知雲南
府有華陽洞橐虛菴集

詩話道卿詩瀟灑絕
俗頗類永嘉四靈

東平道中

驅車涉長道荒塗曠無人斜陽澹古木驚風翼征輪候
館莽牢落日暮寒城闌停驂一以憩振我衣上塵庭樹
集歸鴉依依得所欣如何客遊子不念平生親

新秋汎舟過西莊聽雨話舊

放船秋水落能載兩三人坐愛清波影輕搖白氎巾到
門纔繫纜藉艸便垂綸野飯無兼味嘉魚色勝銀

京口月夜惜別

春江明月夜不是別離時
酌以桃花酒贈之楊柳枝
轉蓬身共遠倦鳥意俱遲
明發天涯路青山惱夢思

園居

人境重重隔溪流宛宛分竹陰
飛翠雨花氣結晴雲籬缺牽蘿補
園蕪植杖芸禽言能細譯幽事賴先聞

上巳日寄鄭虛舟

三月三日春可憐
百勞聲裏花如煙
臨邛大夫有佳客

廣文先生無酒錢放歌誰和舞雩曲洗硯獨寫蘭亭篇
我欲從之問奇字出門無那春風顛

登北固山

孤峰縹緲赴江天白石紅塵樹杪縣一道澄波開斷壁
千林黃葉下寒煙鵬盤寥廓秋風急山缺西南落日圓
萬里中原勞北顧蕭梁陳跡酒杯前

申時行七首

時行字汝默吳縣人嘉靖壬戌賜進士第一累

官少師兼太子太師吏部尚書中極殿大學士

贈太師諡文定有賜閒堂集

馮元成云申公有韻之文對口立就

不為叫囂亢厲之音卑弱浮靡之調古體淵源建安近體沈浸初唐不事摹襲而自無不合詩話趙尚書班識于廷益於早歲顧尚書璘識張叔大於童時傳者以為佳話先太傅公九齡獲見文定文定特起避席時先公未就塾文定留之邸第讀書一日從師出遊先公失足蹈汙泥文定命僮子回取履童子誤持文定朝鞵至先公不敢納文定笑曰履之終當踐我迹耳及舉順天鄉試同學少年有恃才者曰朱兆隆亦能成名耶文定怫然曰兆隆將大魁天下若輩焉知明年先公果臚傳第一其藻鑒不爽若是文定不以詩見長然鉅篇長律鋪揚典麗足令

操觚者縮手如云老去空悲千里
驥秋來真憶四腮魚風度可想也

題清秋出塞圖

生不識醫無閭夢不到狼居胥
瞥然示我出塞圖令我目眩心神徂
憶昔籌邊贊廟謨桓桓司馬傑
丈夫帝授節鉞臨征途高憑熊軾
佩虎符榆關九月沙草枯霜鷹下
擎秋原蕪烟荒雲慘天糝糊惟茲
日出至海隅頻年稱兵無寧都射
雕躍馬彎強弧司馬中令陳司徒
指揮鐵如意玩弄金僕姑揚旌督
戰親援枹萬卒超距爭先

驅衝堅陷陣籌策紆凱歌入奏天顏愉司馬讓功歆若
無但云將士多勤勩何以勞行役請蠲幕府租何以恤
飢疲請發司農儲人人挾纊齊歡呼自從司馬歸江湖
邊人茹苦若堇荼荷戈不解甲輓粟仍飛芻羽檄徵材
官絡繹在道塗震鄰之恐非剝膚騷動根本何為乎安
得再起司馬登戎樞坐紆長策銷隱虞國威震疊邊人
蘇

洞庭篇壽嚴中翰

崔嵬乎洞庭之山乃在勾吳之墟具區之藪芙蓉點點
七十二雙結青螺綰其口我昔凌滄洲振衣千仞巔西
登縹緲接銀漢東望莫釐生紫煙珠宮貝闕儼相向恍
似員嶠方壺天吾聞靈威丈人入林屋手探蒼水金庭
籙又聞毛公羽化留空壇時有鸞鶴來雲端茲山信美
多靈祕幽棲故是神仙地主人三殿倦揮毫出山便作
還山計只今六十早歸田攝生日誦叅同篇洞庭之水
釀春酒醉來恣拍洪厓肩

哭王子幻

慘澹江天裏何人問客星
空傳懷舊賦無復草玄亭
物外悲長往人間忌獨醒
牀頭孤劍在永夜泣青萍

送初主簿罷官歸楚

吳苑初傾蓋荆門早挂冠
宦憐潘岳拙曲和郢人難畏
路窮棲棘芳洲信采蘭浮沈
何足問江漢有漁竿

大閱詩應制

廟略收羣策宸遊簡六師
代當全盛日春是大蒐時
雲

捧蒼龍駕風迴翠鳳旗
轅門開複道帳殿繞行麾
細柳前軍駐長楊後騎隨
虬鬚天策將猿臂羽林兒
拂劍星文動彎弓月影披
連營分雁翼布陣合魚麗
禮示三驅正鋒藏九變
奇張侯仍是豹賈勇盡如羆
引滿雙鵬落騰空萬馬馳
元戎歸節制法從肅威儀
詎數誇邊獵還欣奏凱期
大風歌漢士吉日誦周詩
我祖犁庭烈先皇保泰規
永言思繼述持以贊雍熙

立春日賜百官春餅

紫宸朝罷聽傳餐玉餌瓊肴出大官
齋日未成三爵禮
早春先試五辛盤
迴風入仗旌旗煖
霽雪當筵匕箸寒
調鼎十年空伴食
君恩一飯報猶難

辛卯元日

紫宸元會輟朝天
咫尺無由捧御筵
遲日曛曛虛正殿
非煙縹緲在甘泉
王師未奏康居捷
農扈誰占大有年
袞職自慙無寸補
惟應投老賦歸田

余有丁一首

有丁字丙仲鄞縣人嘉靖壬戌賜進士第三除
編修歷司業洗馬右諭德左庶子出為南國子
祭酒召入為少詹事兼侍讀學士遷太常卿歷
禮部左右侍郎改吏部進禮部尚書入直文淵
閣改戶部尚書兼武英殿大學士終少傅兼太
子太傅建極殿大學士卒贈太保謚文敏有文
敏公集

詩話文敏送肖甫
一律絕類劉文房

送張岨峽

客行新霽後曙色啓城頭
曉徑穿雲濕春塘帶雨流
江
籬牽客思山鳥動春愁
何事新芳歇王孫不可留

塞達一首

達字子修重慶人嘉靖壬戌進士累官太子太
保兵部尚書

冬日登毘盧閣

塞雁南飛迴高樓北望寒
暮雲千嶂暝積雪萬家殘
四

海徵輸盡三巴道路難天涯對搖落那得旅愁寬

林 煙三首

煙字貞耀閩縣人嘉靖壬戌進士歷官南京工部尚書有覆瓿集

諸公餞送城南樓寄謝

冉冉歲云暮于役殊未休冠蓋集相送置酒城南樓微雨霽朝景騁望消人憂蒼蒼遠山色浩浩清江流丹楓羅曲岸白鳥戲中洲景物紛可悅驪歌促行騶衡門昨

棲遲杖屨忝從遊奈何遠離別一日如三秋索居感羈
旅久要慕前修適意豈非達狗祿良足羞山靈勿相誚
早晚歸林丘

府江渡

朝發陽朔崖暮次昭潭渡行邁千餘里孤舟日東驚川
途阻且長耳目漸非故巉巖夾崇山杈枒羅茂樹四望
寡人煙三時昏瘴霧深林蹊徑絕怪石波濤怒虎穴幸
徙蹤狼烽猶置戍客子獨何為艱險常道路雖懷叱馭

心寧免垂堂懼白日易蹉跎玄髮忽改素人生苦拘束
多為浮名誤萬事良悠悠達生庶可慕

苦雨述懷

我行赴京華征途纔及半渡江越淮南原隰何渺漫溽
暑當茲時氣候變昏旦迅雷激中宵陰雲翳層漢山雨
驟淋漓川流俄浩沔陽烏避何許水鳥羣相喚高浪沒
危橋飛湍瀉崩岸我馬淖不前我車勒已斷屈詰歷羊
腸回顧屢顛汗僕夫仰天號客子撫膺歎吁嗟行路難

徬徨日將晏塵中苦局促物外思蕭散挂冠亦繇人何
事長羈絆

戚元佐一首

元佐字希仲秀水人嘉靖壬戌進士除禮部主
事歷負外郎中陞尚寶司少卿有青藜閣橐

詩話吾鄉彭子殷論詩即尚七子然其詩不類
也至戚希仲則全以七子為主臬弇州列四十
子不及希
仲何與

早朝

鳳掖傳呼早晨趨
逼禁闈天香浮輦靜宮漏隔花微
仙掌明河動周廬列宿稀
不知風露重先濕侍臣衣

高則益一首

則益字受所南昌人嘉靖壬戌進士官至四川

叅政

聖駕大閱歌

平明仙蹕下丹霄
千騎風雲擁射鵰
盡道吾皇能將將
軍中誰是霍嫖姚

蔡可賢一首

可賢字子齊成安人嘉靖壬戌進士官至按察
副使有西征鼓吹

樓煩

山後山前十六州天涯盡處是偏頭雲開大漠風沙走
水折長河日夜流萬戶金縉愁見月千羣鐵騎畏逢秋
却思大漢無中策一曲霜笳倚戍樓

鄭履淳一首

公字伯寅海鹽人嘉靖壬戌進士除刑部主事

改尚寶司承建言廷杖終光祿寺少卿有集

詩話昭陵繼世海宇宴清少卿時為尚寶丞初
無言責乃上痛哭之書至云物怪人妖天鳴地
震彗星兩見於尾女日月月繼蝕於元春鬼神告
凶菑害洊至殆有陳涉阿古達之徒窺伺於世
雖李綱宗澤之才展布猶難其亦過於激烈矣
當日子杖一百流血濡縷至今遺袴藏其故宅

春閨

朝來靈鵲遶簷鳴果得雲箋慰遠情但說別來長見憶
歸期依舊不分明

沈玄華一首

玄華字邃伯一字少河嘉興人嘉靖壬戌進士

除禮部主事歷官南京太常寺卿轉大理寺卿

詩話明南都太廟嘉靖中為雷火所焚尚書湛
若水請重建而夏言阿世宗意請罷有旨并入
奉先殿按長陵每自稱曰朕高皇后第四子也
然奉先廟制高后南向諸妃盡東列西序惟碩
妃一人具載南京太常寺志蓋高后從未懷妊
豈惟長陵即懿文太子亦非后生也世疑此事
不實誦沈大理詩斯明徵矣大理性恬退不樂
膺仕歸遂潔白之養歿後玄孫傳弓撫拾遺集
早天失傳是詩獲
於高工部寓公家

敬禮南都奉先殿紀事十四韻

高皇肇太廟松栢連穹霓尊祖有孝孫典禮適升躋一
從遷都後遺制終未睽有司列俎豆上公視瓚圭豈意
歲甲午烈火隳榱題嚶嚶出出音其兆先端倪盈庭議
移祀中廢成町畦猶餘奉先殿薦新及菹醢微臣承祀
事入廟歌鳧驚高后配在天御幄神所棲衆妃位東序
一妃獨在西成祖重所生嬪德莫敢齊一見異千聞實
錄安可稽作詩述典故不以後人迷

徐廷綬一首

廷綬字受之淳安人嘉靖壬戌進士除刑部主事歷貲外郎中出知辰州府遷陝西按察副使有錦泉集

胡松麓自瑞州以書見寄

搔首西風裏懷君思惘然江湖千里隔雲樹寸心懸客淚隨猿落鄉書有鴈傳惟應今夜月相對共遙天

王叔杲一首

叔杲字陽德永嘉人嘉靖壬戌進士官至湖廣
叅政有玉介園藁

詩話王氏為永嘉族望其先世毓生七子七子
生二十八子二十八子生九十四子九十四子
生二百六子二百六子生三百五十子叅政其
一也三百五十子生四百九十子其枝葉亦繁
矣昌

初冬登大伾山

初冬飛蓋拂晴雲共陟嵯峨探祕文河勢已非神禹鑿
山形還是太行分崖端想象懸金粟洞口虛無散紫氛

登眺壯懷聊此寄酒闌歸路已斜曛

穆文熙四首

文熙字敬甫東明人嘉靖壬戌進士除行人進
司副遷工部員外改尚寶司丞轉吏部員外出
為廣東按察副使有逍遙園集

石拱辰云敬甫
早年詩頗豪宕

摩鍊既久
遂臻大雅

詩話敬甫論詩沾沾自喜亦強作解事
爾集為劉子威石拱辰所定又安得佳

送葉龍塘道長謫邵陽

重來燕市蹋紅塵
驄馬憐君氣象新
一疏即看成遠別
寒風冷雨入三秦

贈張弘軒都諫出參晉省

馬度恒山萬嶺西
天涯何處為招攜
玄都莫道花如錦
一日東風盡作泥

聞拱辰符卿至自京志喜

漳水燕山道路賒
相思常苦暮雲遮
到來不必論時日
三見庭前木槿花

題乾山卷

幾年為客滯江關
夜夜汾陽有夢還
卷裏畫圖君莫看
斷人腸處是家山

楊汝允一首

汝允字惟明南昌人
嘉靖壬戌進士歷官姚安
知府有九霞山人集

同日冊封六妃

宮花笑日草生春
喜動天顏沐寵新
同侍翠華遊幸地

不知辭輦是何人

錢貢一首

貢字時庸桐鄉人嘉靖壬戌進士除知新建縣
入歷刑部郎中有愛存橐

京邸懷歸適妻弟唐楮汀來謁於其還賦長句言
別

此日意不樂掩關有所思忽聞君遠來錯愕令我疑平
生不辭鄉安得來京師去年與君別屈指已一暮南望

懷故人日與浮雲馳嗟予坐羈束素顏日以緇金門盛
才賢迂疎將何為感之百憂集歎息還自嗤君今馬首
南握手復何辭投簪雖未能煩君語吾兒貧賤雖爾慙
富貴匪我期願言各努力勉將門戶支子家柞溪東綠
水環茅茨豈獨饒桑麻松竹植亦宜好闢十畝園樹藝
須及時護筍編枳棘灌花引泉池待予此中老與君同
栖遲此願良未果永懷常在茲去去勿復陳人生多別
離夜闌欹枕卧暑雨捎采蠹

詩話錢公居甌山之陰沒葬山麓其後人至今聚族柞溪左右桑麻松竹蔥蒨依然長篇不事雕繪有白太傅遺音

楊成名一首

成名字志完建安人嘉靖壬戌進士武進知縣有遂初集

秋日郊行

路遶溪流細山迴樹色分客沽村店酒牛卧隴頭雲林葉含秋露溪煙澹夕曛兒童迎我笑拍手自成羣

許國二首

國字維楨歙縣人嘉靖乙丑進士改庶吉士除
簡討歷編修右贊善洗馬遷南國子祭酒轉太
常卿協理詹事陞禮部侍郎進尚書入直東閣
加太子太保累晉少傅吏部尚書建極殿大學
士卒贈太保諡文穆有許文穆公集

擬御製勸農詩

四民皆天職嗟農獨苦辛所以古哲王巡省及茲辰簫

鼓吹豳詩訓迪良諄諄東郊土脉動好鳥鳴芳春桑間
拂其羽催耕一何頻乘時播嘉種原隰何勻勻念茲民
所天珠玉安足珍一日苟不作飢寒將立臻勿惜沾體
勞但憂年歲屯沾體勞尚可歲屯傷我民憶昔先皇時
端居軫郊閭載賡憫農咏丕揚烈祖仁禁苑籍千畝雨
暘雩百神玉食豈不足貴令四海均九重高結念汎爾
謀其身古人有良言歲計在於寅豈伊公家賦婦子亦
相親春風正發育萬物皆鮮新勉以東作力佇見西成

裡

秋聲

銀漢滄浪淨碧空
天街一葉下梧桐
霜前淒切無砧杵
月裏悲涼斷塞鴻
何處羈人驚伏枕
幾回中夜感飄蓬
繇來志士輕搖落
莫向西風憶桂叢

何洛文一首

洛文字啓圖信陽州人嘉靖乙丑進士選庶吉
士歷官禮部左侍郎兼翰林院學士有震川集

詩話震川大復之孫仕雖通
顯詩頗庸熟去祖武尚遠

章皇帝御筆白馬

臺上黃金駿毫端白雪驄
玉花生御榻寶繪奪天工
照夜雙珂瑩凝霜匹練空
瑤池仙馭遠猶見畫圖雄

周子義一首

子義字以方無錫人嘉靖乙丑進士改庶吉士
歷官吏部左侍郎兼侍讀學士贈禮部尚書謚
文恪有交翠軒佚稿

送何小坡致政還信陽

海鶴遠置網冥鴻謝鞬籠人間千丈絲安能繫游龍所
以達命士脫迹塵囂中眇茲盈尺組曾是羈我躬何侯
東海彥司牧早奮庸一麾指淮右載旆佐漢東斯民有
父母國論方爾崇朝宗甫竣事高蹈隨赤松薄言戒行
李云歸天目峰惜此遠行別不得少從容載歌驪駒詞
聊以紓我衷

林如楚二首

如楚字道翹侯官人嘉靖乙丑進士歷官工部
右侍郎有碧麓集

初秋齋居作

招搖指坤隅六龍忽迴軫清商應候至碧梧乘夕隕離
居及素節徙倚步華楯睠彼元運馳往復良有準人生
何勞勞年命如朝菌曩觀隨化徂新緒緣物引無以騷
人悲將貽榮公哂吾其解天弢去來守元牝

會江驛

停舟異昔年城郭尚依然樹影浮天外江流會驛前暮
帆懸海月晴磬出山煙稍喜春來近居人話種田

陳文燭三首

文燭字玉叔沔陽人嘉靖乙丑進士除大理評
事歷寺副寺正出知淮安府遷四川提學副使
歷漕儲叅政福建按察使右布政使江西左布
政使陞應天府尹終南京大理寺卿有二酉園

五岳山房集

胡元瑞云玉叔詩清
婉典飭居然名家

送楊惟喬侍御北上

驛路飛新雨
荒亭落晚風
賜環霄漢上
擊楫大江中
此地曾留犢
都人尚避驄
春華今又半
尊酒幾時同

送陳仁甫太史使楚

玉署承天遣
桐圭錫帝封
浮湘即司馬
作賦是元龍
春盡寒江雨
潮迴故國鐘
禹碑如可辨
還上祝融峰

送別

落日青絲騎
西風白苧詞
廣寧門外柳
折盡向南枝

管大勲一首

大勲字世臣鄞縣人嘉靖乙丑進士改庶吉士
官至南京光祿寺卿有休休齋集

安慶渡李陽

客路荆舒盡江帆海國賒天風蔽晴日煙雨漲平沙水
闊疑無岸春深不見花暮潮南浦泊指點驛樓斜

胡 洵二首

洵字原荆無錫人嘉靖乙丑進士除永豐知縣

再知安福入為廣西道御史以建言落職為民
有采真堂集

詩話侍御以建言削籍任俠結客所識窮乏多
受其恩歿後王承父為具狀屠緯真為銘墓王
元美為作傳咸盛稱
之詩亦間有合作

過雅宜別業

不見王摩詰猶餘華子岡隔河山杳靄斷樹水微茫有
子開松徑留歡正夕陽漁舟投暝合杯外即滄浪

梅

隴上春風生江梅幾枝發仙人坐吹簫飛墮一樓月

潘志伊一首

志伊字嘉徵吳江人嘉靖乙丑進士除定州知
州升南京兵部員外歷郎中出知九江府謫知
陳州移紹興府同知轉南康知府以江西按察
副使備兵袁州以行太僕寺卿轄甘肅遷廣西
叅政

詩話潘公從游吾鄉沈石雲先生之門講學之
餘詩不多作所題存石草堂一篇即石雲之書

屋也

題存石草堂

名園迴塵域參差開石林丹梯襲曉光碧嶂含夕陰昔
自鬱林來置此閒幽襟緬彼巨靈跡宛在梧江潯夫子
肯堂構誅茅面雲岑棲巖意已遠陟謁思逾深樞衣緣
磴道拭目見嶽峯茲言懷仰止誰謂愜登臨

沈淵一首

淵字子源濟南新城人嘉靖乙丑進士改庶吉

士授簡討進編修陞國子司業有中祕橐

塞上聞笛

何處吹羌笛秋風度玉關幾年愁作客此日更摧顏慘
淡邊雲合淒涼朔雁還梅花知盡落一夜滿天山

許 儼 一首

儼字文夫靈寶人嘉靖乙丑進士除三原知縣
徵授戶部主事歷員外郎中出知漢中府調南
寧陞陝西行太僕少卿有後崖集

西坪路

蒼蒼古木中夕陽忽已晚隔浦聞雞鳴人家知不遠

王圻二首

圻字元翰上海人嘉靖乙丑進士除清江知縣
調萬安擢雲南道御史出為福建按察僉事謫
邛州判官兩知進賢曹縣遷開州知州歷官湖
廣提學僉事陞陝西布政司叅議有洪洲類橐

吳明卿云洪洲詩不落筌蹄不涉蹊徑惟意所
適一無蹈襲郭美命云遠之北地信陽近之

海門所稱七子此亦一是非彼亦一是非諸君子為的而後進之士射聲焉未有能中者也先生詩黜其佻巧而本之自然謝其夸毗而歸之實際去其叫噪而由乎冲虛盖矯志而獨行者也陸伯生云先生詩近大厯貞元之際晚年冲遠入陶韋門奧詩話洪洲拜分陝之命即請告終養既歸淞江之濱種梅萬樹目曰梅花源仰屋梁著書門涵皆安席硯所撰續文獻通考諡法通考兩浙鹽志海防志三吳水利考稗史彙編雖舛漏尚多體例未當要亦留心有用之學者

觀忠惠祠有感

傑哉龍陽尉忠義今所希民瘼一憤激抗疏干天威手

持登聞鼓口叫閭闔扉但念流亡苦豈惜軀命微雉經
悟明主捐生視如歸歲額減過半始願終不違皇恩與
士節千古同光輝春秋薦蘋藻英爽此永依遺跡炳簡
策身沈名自飛願爾賢達裔奕世延清暉

商丘早行遇雪

雲暗商丘野天連葛伯城懷人宵不寐奔命雪仍行粉
絮因風舞瑤華帶雨傾貂裘寒欲透客淚洒塵纓

歸有光六首

有光字熙甫崑山人嘉靖乙丑進士除長興知
縣量移順德通判遷南京太僕寺丞有震川先
生集

詩話龔洲早年評震川文謂如秋潦在地有時
汪洋不則一瀉而已晚歲乃作贊云千載有公
繼韓歐陽子豈異趨久而自傷蓋悔
之深矣詩非兼擅然猶勝七子成派

遊靈谷寺

晨出東郭門初日照我顏春風吹習習好鳥鳴啾啾巖
阿見黃屋登坡尋神山半日猶山麓十里長松間蜿蜒

芳草路寂寞古禪關畫廊落丹雘朱戶蝕銅鑲殿起無
梁迴塢留玩珠攀蒼鼠戲樹捷野鹿看人閒山深靜者
愛日宴未知還

和俞質甫夏雨三十韻

浮雲方靉靄光景遂已戢
浹旬深靈澍千里破封蟄
茫茫河伯歎蕭蕭山鬼泣
靈曜邃高居朱明閤赫翕希微
澹將開浙瀝吹又急
遇夜轉連綿醺流更潄漑
萬壑嚕霰鳴百川灌注入池容
添紋縠林色浸淤浥離畢月暫

耿宿井星恒濕歛濫湖光翻感咽海潮澀霓旌尚高翔
雲衣猶日緝水覆詎可收天漏誰能葺馬牛三江混鴻
濛九峰立嗟我來自東獨行阻虛邑夢裏思明兩筮坎
成游習誰假卜商蓋但戴杜甫笠繽紛餘花落寂寞愁
烏集窮巷長閉門高河近通汲天地政氤氲雷風遞呼
吸悽悽聽晨鳥濛濛睇宵熠作人徵時暘思文憂民粒
鼃黽費灰洒魚蝦饒掇拾廣室坐增悽匡牀聽生悵何
由度日關安能使家給泥塗跲重繭梅潤侵什襲寒袍

故戀綈瀾簡慵啓笈顧歎風雲滿寧使蛟龍蟄短屐徒
齒齒折巾空岌岌俯仰觀宇宙塊北迷原隰阻飢知不
免寅亮豈所及

寶應縣阻風

夜泊淮陰城蚤向淮南路理棹逢西風猖狂恣號怒清
河千里中東風日相悞祈此一日風終竟不可遇蒼天
豈有心莫可詰其故但看北去舟凌風如飛渡翻為去
人快頓忘吾所務淼淼湖波深今日何可渡

邢州敘述

為令既不卒稍遷佐邢州雖稱三輔近不異湘水投過
家葺先廬決意返田疇所以泣歧路進止不自由亦復
戀微祿俶裝戒行舟行行到齊魯園花開石榴捨舟遵
廣陸黎棗列道周始見栽苜蓿入郡問驛驢維當撫彫
瘵天馬不可求閭閻省徵召上下無怨尤汝南多名士
太守稱賢侯戴星理民政宣風達皇猷郡務日稀簡吾
得藉餘休閑門少將迎古書得校讐自能容吏隱退食

每優游但負平生志莫分聖世憂
竚待河冰泮稅駕歸林丘

甲寅十月紀事

經過兵燹後焦土遍江邨
滿道烽烟跡誰家雞犬存
寒風吹白日鬼火亂黃昏
何事征科吏猶然復到門

初發白河

邊風刮地起黃沙三月長安不見花
却憶故鄉風景好櫻桃初熟正還家

索尊尼 三首

尊尼字魯望長洲人嘉靖乙丑進士官至山東
提學副使有集

長安感遇

朱華謝南土遊子客冀方豈不念遄歸簡書勞未遑悠
悠若懸旌倏忽意靡常魏牟阻江海蘇子怨河梁失路
良可悲曠望迷周行春陽念將歇滯淫非我鄉願假鸞
斯翼超飛歷故疆

長興徐太守自汝寧歸王元美諸君同集胥江分韻贈之得關字

自薄淮陽守終然返故山江湖一麾罷歲月二毛斑中
論何當就浮名祇是閒因君夢蒼水早晚叩雲關

送長兄再入留都

雲陽郭外艸萋萋作陣楊花路欲迷幾樹黃鶯啼不歇
行人回首晉陵西

李 栻一首

栻字孟敬豐城人嘉靖乙丑進士官至浙江按察副使

送友人還楚

南浦仙舟發颶風江上清故人從此去悵望若為情落
日浮彭蠡歸雲滿洞庭思心逐流水西下武昌城

施愛一首

愛字欲周福州左衛人嘉靖乙丑進士歸安知縣有息菴集

寄李五

噫嘻復噫嘻與君恒別離
祇隔一溪水相見良難期
芊芊池畔灼灼園中葵
倏然悲風來凋謝寔淒其
思君老玄鬢忽成絲
贈君青萍劍神物合有時

明詩綜卷四十九

總校官庶吉士

臣

張能照

校對官檢討

臣

盧應

謄錄監生

臣

姜澍

欽定四庫全書薈要

集部

明詩綜卷五十

詳校官編修臣汪鏞



欽定四庫全書薈要卷二萬五百二十三

集部

明詩綜卷五十

翰林院檢討朱彝尊編

皇甫冲

七首

冲字子浚長洲人嘉靖戊子舉人與弟濬汧濂

並有盛名稱四皇甫有華陽集

弟子循云兄詩兼綜諸體之妙

而不能稱之以一長蓋臻名家之奧而不能擬之以一子此二陸解藻獨秀於平原三謝聲華莫先於康樂也如樂府雄深古選雅澹歌行縱逸五言近體之典麗絕句之清婉差弱者其七

言近體乎

張文寺云四皇甫之才子後為冠

鍾廣漢云皇甫昆弟詩如謝家兒女張燈蠟

淚皆成

珠鳳

靜志居詩話四皇甫詩源出中唐兼取材於潘左江鮑清音亮節淨埽氛埃高蘇門華鴻山楊夢山而外無有及之者

順義戰

鄰有順義人告我庚戌事
八月月生魄道傳邊兵至
朝聞古北屯暮見遼陽騎
李生正下帷奮激報守吏
守吏不敢言雙目乃直視
馳馬歸赴敵城門忽已閉
登城望

家室膏血乃塗地里閉盡焚燒妻孥身首異李生按劍
怒眦裂聲色厲詎惜中山羹甘心河東棄惜哉無一兵
不能為之計乃有陳使君挺身獨不避下令開四門彎
弓插兩幟左書報仇文右寫勤王字當門據方牀潛軍
弛銜轡李生與之俱不覺增勇氣謀者來覘窺一矢兩
人殪卒驚齮指奔倉皇解圍去城邑不破殘凡以二子
庇功高主不知事往名亦墜斯理自古然况乃居今世
請君勿復言此事猶為細

安山道

泊舟安山道忽見山南船銜尾若魚麗鉦鼓紛喧闐樓
櫓樹干盾笈箸插戈鋌琯弓赤羽箭朱旗當檣懸長年
盡紅巾抹額絳絲纏言與羣盜鬪僅不為摧殘請看身
上創衣血何新鮮聞之不敢進倚櫂生憂煎載聞持節
使提兵羅河壩脫者有重聚獲者無幸全哀此封中氓
棄擲潢池間雖云饑寒故信也誰為宣懷保道不足政
刃皆深淵服妖古所畏涓涓乃滔天巢角鑒不顯此理

庶可研

上已觀田橋袂袂望所期客

青山結層嵐新流漾周澤陽景屬良辰游人滿晴陌聯
翩塘上行去來江邊客拾翠行且留擷芳散還集臨賞
遲所思摇摇冀來覲夢寐時見之寤言忽復隔昔人三
秋懷宵旦今屢易為問修袂人憂心何能袂

從田橋石徑赴拂水

江光開初霽山雲未全斂輕煙尚棲花積雨猶在蘚攜

履遵迴麓援蘿上修岷環林何逶迤磴道幾回轉游心
自忘罷策足乃知蹇含章樂丘園耽隱易台鉉頗使昔
念舒乃得今抱展將尋出世人一往不復返

於巖石上眺東西兩湖

旭踐山中蹊午憩巖上石雲移石欲墮雨霽蹊猶濕倚
策眺兩湖波光渙相襲東若既紆青西蘅亦凝碧芙蓉
落雙鏡天影浮重壁不覩水分流但覺洲如織檣烏有
離聲磯鷗無並翼會茲物化情感彼高深迹從適得所

遣何為苦拘迫

維摩寺雨坐

回嶺無仄徑陟岡有夷壤展睎入空濛游心益昭朗長
風吹輕衣飄搖翠微上古寺迷夕煙明燈澹綃幌冥雨
從東來驚雷自西往林巒忽不見但聞山澗響景寂非
避喧心瑩乃成賞為禮沉疴蹤因之知幻象

送劉朝甫還吳

同游心事已成非忍向都亭復送歸二月渾河水尚合

三春禁柳色猶微舊來道路愁能記此去音書憶到稀
極目輕舟雲水上別君那得不沾衣

皇甫湊

三十五首

湊字子安嘉靖壬辰進士除工部主事調禮部
歷郎中改補右春坊司直兼翰林簡討左遷廣
平通判量移南京刑部主事進員外陞浙江按

察僉事有少玄集

文徵仲云子安詩沉蔚偉麗
早歲規仿初唐旋入魏晉晚

亦玄造鑄詞命意直欲窺曹劉之奧而及之
兄子浚云子安體骨奇俊詞采英發陳風諭則

婉而不迫敘政事則直而不俚頌功德則豔而
不誣不取妍於一字不求工於一詞詠之而有
餘音咀之而無窮味弟子循云兄詩錯綜魏
晉而託宿於唐英特工五言而七言近體薄不
經想其為篇也幽玄以通思春容以御氣婉麗
以陳詞和易以達理憤懣以抒情絲暢以該事
雋永以歸趣其始構也隻字不愜於心片言無
豔於目踟躕壁窮思擁食寤索曾不少休是以吟
苦則彌日不就神來則下筆立成王元美云
皇甫子安如玉盤露屑清雅絕人惜輕縑短幅
不堪裁翦黃清甫云司直咀華八代會心古
人每製一篇必經百慮故能盡脫凡近獨詣高
遠晚薄杜陵之史心醉殷璠之鑒擬之謝客則
調頗道方之常建則音稍振陳卧子云少玄
凝思選調意求雅則惟取
境不廣無縱橫宕逸之致

詩話子安逸藻風飛清文綺合視子循工力悉
敵銖兩未分宜子凌之難為兄而子約之難為
弟也

春日齋中即事

仲春氣妍和蘭薄幽可踐開軒眺遠野文霞靄曾巘黃
鳥鳴芳菲綠蘋泛清淺感物懷古人緇帙聊自展嘗欽
柳下黜頗悅邴生免苟持齊物心得喪兩俱遣

秋宵宴會與周山人以言

嘉賓眷清夜相與娛思憂憂思沉中曲惜別屈徂秋顧

念一世間快意焉可求別易會獨難世短歲復道促襟
展謔浪感此極歡遊明月懸中天芳華隨觴流妙歌激
雲漢為樂四座周抒情告君子太康毋我尤

雜詩

凝霞晦朱陽繁雲結玄陰有滄興崇朝淫溢遂成霖涌
溜交簷曲浮苔冒水潯冥霧縈綠池悲風激丹岑惟彼
倦游客感此物序侵慕類興長懷含思寄微吟

秋日雜詩

廓處之歡悰出門眺長衢悲風吹落日四顧無行車蹉
跎失盛年感慨獨嗟吁況我在樊籠六翮不得舒撫劒
思西邁安能守故廬淮陰困閭里馬生戀邊隅桑梓豈
我志蓬蒿非我虞行行舍此去去去浮雲俱

贈韓侍御謫滁州

皦皦原中日照此城闕寒登山送歸客臨塗悵盤桓借
問子何之奇服涉江干遠斥千里道飄飄冒驚湍急觴
遡征雲悲風激長瀾我馬懷曾岡佇立發哀歎忼慨無

所道贈子以加餐

月夜贈伯氏叔季氏山人以言

歡游美清夜高會良在茲金飈薄綺櫺鮮雲蕩華池涼
氣發喬林湛露零丹桂皎月升前隅中庭粲其輝密親
既已具蘭友相攀追繁音豈不奏所樂吹埙篪齊願等
金石皓首長不睽

送周氏

清晨餞我友駕言遠徂征前瞻齊魯墟千里浮雲興親

交豈不昵懷役不遑寧曠野饒悲風揚塵翳邊庭中衢
雪霰集邊馬寒無聲蹊谷無行跡側足層冰橫回首望
京闕能不惻中情子其祇自愛順時保榮名

省中贈別

祇役辭蘭省驅車邁京陽大江浩無極游子心慨慷疎
星歛華闕朝霞興崇岡平原一顧望山樹靄蒼蒼集送
臨城隅轅馬各傍徨道路豈云遠各在天一方念與我
友別侘傺中自傷

懷申生

昔我承嘉惠竄跡大河潯
洪流逝滔滔游子憂思深
回風飄虛閣索處悲難任
申生蘊璵璠投分義所欽
綠綺久不奏為予激哀音
眷眷感離志冉冉遂逮今
晤言恍如昨一別歲載陰
微我殷思勞非爾誰為心

十四夜月

廣庭淨霄色良夜月流翫
况對巢箕人同懷發幽讚
散步林暝交微星吐華粲
彼美雲中魄徐駕升清漢
玉彩

含霜來金霏隨風散繁絃起兩階孰知我心亂

十六夜月

明月有常翫員景亦不易三五昨已邁人生良如寄興
雲結長霄清暉何由被弦望相推移賞心邈難嗣卽事
可逸生取樂在適意綴我巴人響歌之聊代匱

十七夜月

清風歷網戶皓氣流中庭佳期殊惠來金波耀華星諒
知蟾兔缺髣髴素娥形為樂貴及時百年詎我齡放歌

目馳藻結思凌高冥且念參酒德萬物如浮萍

予嗜琴山人張子妙得古法嘗學焉而予輟響久
矣舟夜臨流對月發琴而彈之興慨命篇

伊予寡世姿由來慕丘壑長從嵇生玩假物思所託匪
盡至人理聊敘逸民樂改服睽宿心久負長往諾石房
綴幽響泉蕊迎秋落沿沂開昔襟浮彈昨間作滄波流
潺湲明月照灼爍想見乘風人長懷披雲鶴且以慰營
魂拊心終繇邈出處焉是非俛仰笑今昨

元城書院示諸生

予昔慕丘園守道甘時棄弱植踐芬華介石慚貞義一朝世網嬰來為河曲吏迨茲民務隙肅徒究經事廣除氣暄妍衆芳粲以賁清風閒鳥雀日華搖薜荔高閣敞雲霞游目適我志雖無兼席長頗協下帷思相與觀四教宅德歸一致忘筌舐所期反約良為懿

夏日幽居述懷

九巖多靈樹秦望有飛泉臺尚逝云久披籍慕其言念

當去人羣返耕南山田即林事經始荷蓀開雲煙疇昔
嬰華組芳歲屢徂遷憂思徒以積志髮坐相捐常恐衝
飈激鳥路不及旋彼美淑人情緬邈誰為宣

雜興 二首

薄雲散清澍秋氣滋寥廓傾暉奄西陸涼飈淒叢薄羈
人苦物役容華逐年鑠沉吟覽時化空堂寂不樂惟我
同心友守道厭蓬藿高舉遺萬物逍遙處一壑永念從
之游無為自束縛

驚節流炎紀馳暉屆清商游魚湊重淵蟋蟀鳴空堂白露滋前墀陰風來北房我心亦何思所思天一方離居宛如昨再覩鴻鴈翔含情撫遙夜申旦獨徬徨哀彼采葛詩零淚霑衣裳

茅山

杳靄登春山嵯峨入雲嶺微竒不覺遠發興日初永石叢孤亭秀花覆仙竈冷長揖山阿人坐使塵慮屏

自溪口歸

朝來醉別酒溪上孤舟還遙村轉江路落日迷松關平
波望煙樹百里滄茫間坐愛丘中事春雲留碧山

將命巡輶徙倚署閣

彌辰倦紛牘徂春悵無樂庶以散予襟獨此稽山閣霞
蔚見層巒花深隱羣壑本自滄海人悔吝滋縻爵旋理
東江輶徘徊眷林薄俄頃惻幽衷遇物悲離索且憑浮
雲征聊希至人託

使中都道中作

將命適遠京風駕戒征侶臨流別友生野塗曠延佇靖
恭爾所敷我志不遑處揚旆越修垌舒節薄蘭渚日夕
秋風生曾是歲不與淒淒聆候蟲肅肅望歸羽蘊結愁
我心沉憂誰能去悟彼詩人言歸來藝稷黍

發郡城之天台道中述所經覽寄孔謝二憲副趙
何二僉憲同年

夕夢曾城阿曉行滄波上縈溪復含流連岑時隱障風
湍信千轉雲峰非一狀錦繡紛迎翫氛氲忽彌望蘭泉

芬可掬苔壁險難傍思偕同懷子攜手追禽尚

由桐柏嶺趨瓊臺遊眺

桐觀臨雲壑遙從此路迴石門藹天闕借問幾時開鶴
羽下清漢仙蹤空碧苔山人仍自去日暮嶺猿哀

十六夜月

牛渚風流地清江萬里長今宵懷謝尚乘月益清狂勝
事已云盡佳期何可忘涼風吹舞袖白苧滿秋霜

春日金元伯見過

當時好奇客頻過旅人居及此歸來日翻憐會面疎
花前茲夕醉湖上隔年書意氣君休問嗟今已不如

致道觀溪口

宿處玄林靜鐘聲清夜初星河仙嶠滿雲霧洞門虛
竹下邀中散松前問隱居溪陰是天路獨往意何如

和子約莊遊對修和觀懷往

仙宮緣縹緲孺子問滄浪獨望青山郭空懷碧草芳
田疇諸島接雞犬百花藏何以寄幽興前溪春水長

靈峰

靈峰望縹緲疑是接曾城梯繞丹霞入人攀碧樹行洞
門山日落石室海雲生何事吟招隱空令猿夜驚

再別兄弟作

可歎江潭客重為魏闕游河梁一悵望芳草劇含愁隴
樹三年淚邊雲萬里秋無由慰棲泊羈影任悠悠

宴東河流杯亭送歐陽大參赴蜀

流杯亭上酌修竹亂溪紋暝樹煙常合春山雨不分別

情依去鳥客路入重雲懷舊仍傷遠勞歌夜獨聞

席上送子循弟

離樽日南至行役魯東門海徼雲千里寒城雪滿原聽
歌仍有淚執手已無言何異飄飄鴈年年別故園

早秋楊村旅次懷伯氏季氏

滿川風露急涼度海門初薊葉先秋下江星永夜疎客
心憑北極鄉路憶南徐塞鴈何時至平原有素書

寄懷諸兄弟

萬里南飛鴈何時塞上來客愁懸落日鄉夢繞胥臺投
筆情猶在垂竿老未催淹留此懷舊長使壯心衰

聞家兄之金陵

聞君理孤櫂欲向金陵遊却憶追歡日翻成羈旅愁鐘
流客館夜砧響帝城秋得似滄江鴈東飛白鷺洲

過維揚作

念昔恭明祀三秋滯楚鄉今來還上國五月渡維揚戀
土情何極瞻塗意轉長川原歷迢遞煙樹引微茫浴渚

飛鳬下驚沙白鷺翔江隅有芳草幽思獨難忘

皇甫汈 三十九首

汈字子循嘉靖己丑進士歷工部郎中謫黃州
推官召為南京吏部郎中又謫開州同知量移

處州府同知陞雲南按察僉事有司勲集

姜玄仲云

子循詩全效康樂 王元美云子循今體風調頗似錢劉 穆敬甫云皇甫伯仲以詩為業各臻妙境而司勲尤為白眉 胡元瑞云子循五言清空瀟灑色相盡空雖格本中唐而神韻過之

詩話百泉清音藻思五言整於小謝五律雋於中唐惟七言蔥弱兄弟攸均集六十卷自言始為關洛之音變而為楚再變而為江左三變而為燕趙四變而為蜀既近初服取箇中豪檢閱凡興寄未深格調不古語非絕俗句非神采者刪之且曰有志慕古而力不逮心恥時尚而薄不為又言關中之詩猶燕趙之詩屬齊魯之詩侈河內之詩矯楚之詩蕩蜀之詩溫晉之詩鄙江西之詩質浙之詩啍吳下之詩靡有高視一世之概焉要其五言清真朗潤妙絕時人匪徒大攻伯仁而已

過武城謁言子祠作

朔風枉輕帆戴星理扁櫂
超忽之武城有蕩瞻魯道古

邑一何卑令猷久彌劬弦歌謝清響精華契深造曰予
廁文儒眈寂違時好剖符辭帝京腰章宰名趙諒乏操
刀資懼貽製錦誚經過緬遐躅神對宣幽抱言采江上
繁薦此廟中貌誰謂千載殊可以同高調

奉荅子安兄

江郭改故陰家園藹新霽柔條始發林芳草漸紆砌潘
居信為閒揚亭况重閉曰予忝明時與子承嘉惠分省
各有譽佐郡慙所涖暫就北山招轉愜東田稅情忘桃

李言跡豈匏瓜繫感遇興長謠來章緬幽契

寄懷王道思

本乏希世姿翻為逢時誤良友豈不懷適征詎遑顧日
暮勞所思凌風未成晤將從夢寐求緬邈山川路

秋夜把酒對月

宋生陳九辨陸機歌百年悵茲清秋日聊使幽懷宣矯
矯歸雲鴈嘒嘒含風蟬推芳委朝露俄景流夕川鱗運
有代謝薜榮無常妍始知行樂貴何用居情牽長夜思

秉燭新月正登筵金尊泛綠醕寶瑟絀朱絃商歌當棗
下楚舞出花前餘名焉足藉達生乃為賢

仲秋之月諸晁燕私風月雖佳雲雨或間

五首

奉義游京邑數載違親宴迢迢明月光照我越江漢何
如故鄉夜及此清秋翫鏡彩攬未盈璧景委纔半桂樹
敷丹英華萼紛相煥雖謝西園悰庶附南枝翰

良辰信具美清夜永為歡明月已幾望華彩流雲端廣
庭置芳座高會列盤餐但云杯行緩不惜露下寒情來

感今易跡往戀昔難一聞關山曲猶似別長安

牧賞每卜夜行樂聊及時秉燭且不寐待月豈云罷
鱗玉葉薄皦皦金波遲高臺臨窈窕迴塘生漣漪載歌
蟋蟀唱復詠鵲鵲詩清輝一以鑒素心同所期

嘉月有餘照歡晤無限情寵弟載旨酒要我坐華楹
冀齊英復萎桂滿輪乍傾忽忽愁霖至瀏瀏悲風鳴員缺
遞相運明晦焉足驚太康靖往訓知止崇令名

肅肅歛朝雲娟娟收夕霧江上珠始來天際鏡方露列

宿齋掩綈凝霜共呈素嘉肴尚堪薦美酒猶足具良友
且無歸劇飲酬茲遇所願揚末光何辭照遲暮

秋宵酬子安兄作

清夜游家園眷言懷丘壑素月升員靈千載共寥廓始
出東南樓俄頃西北郭華燭滅蘭堂金波蕩羅幕雖過
二八時光彩紛綽約商歌正流響魯酒亦未薄人生貴
適意胡為坐羈縛結髮從至今朱顏悵非昨冶服豈常
翫榮名焉足託良會聊具陳麗藻復間作穆如揚清風

榮若敷春萼申意忝惠連何以獻康樂

秋日往梅林莊居

疏公守舊業班生慕常廬薄游千里外一出十載餘偶
與密親邇慙焉懷所居東林扉尚偃北郭逕始除青山
鵲盈戶綠水湛通渠流盼悉成往眷言思遂初將從古
人學乞歸事耕畬顧驚年跡垂坐使情興紆

冬日往虞山作

故鄉誰不懷名山矧予慕一為塵跡牽遂闊賞心晤偶

值芳歲闌遙泛滄洲趣澄江帶餘霞丹壑收殘霧嚴霜
委野草寒飈振皋樹指塗尋舊蹤流盼成新寓魚樂媿
淵沉鴻冥羨雲鷺歸來徒見今履往悵非素

送陸宜甫還洞庭

烈士晞康衢逸人免幽壑矯翼鮮寧棲潛鱗有深託陸
君箕穎流雅志甘場藿被褐自行吟持經事耕作別來
歲屢邁念往迹猶邈避亂辭東山韜光翳南郭聿暮促
歸心申章敘離索雪積湖上居雲停林間閣挂席迴青

陽援琴遲芳酌願保黃髮期無渝素心諾

臘月十五翫月荅子約

員景攬兔升馳光感駒隙西園將密親南樓遲佳客生
無百年期能幾三五夕旨酒盈樽壘高堂間琴瑟請誦
唐風詩胡為坐拘迫棟華眷季方摘藻凌希逸往晤迹
易陳來悰會難逆再滿清夜輝寧知芳歲隔

偶懷虞山之游因東張比部寰

我昔虞山泛登臨暮景斜雨迷當岸柳風度隔巖花奈

此淹京邑傷哉歷歲華張騫高興在早晚待星槎

送陸給事燦謫都勻驛

國論何年定鄉心此夕搖鴈飛天畔驛龍隱日南橋謫
宦恩非薄居夷路詎遙誰憐梁太傅淚灑漢文朝

蠶室成

蠶館開周典鸞輿扈漢儀棘牆春窈窕桑沼晝漣漪
獻夫人日衣明上帝時娥媼御王母玉珮降瑤池

泊維揚

地是南來域江分北望賒空餘前代宇不放昔年花物
色圖丹壁春風想翠華誰憐歌舞處日暮有啼鴉

臘月十五夜

坐惜青天月能餘此度員乍來梅蕊下猶滿桂叢前江
浦潮難落關山思可憐催人三五夜含照入新年

承天候駕

二首

東幸方過沛南巡乃至衡翠華臨楚地黃屋駐樊城雲
以朝歌白河因夜渡清寧知天子貴別有故鄉情

茲地承嘉惠仙班喜復從天行傳駐蹕月出候鳴鐘禮
樂河間事山川灞上容由來江漢水何處不朝宗

靈巖

棟宇開靈獄池臺隱廢宮已看塵劫遠猶想霸圖雄野
霽呈秋色濤喧見晚風從知挂帆意遙在五湖東

十月十五夜月

清漢月仍滿空山歲欲闌入林無葉礙映水覺池寒遠
道心千里高樓思萬端誰能三五夜長及盛年看

舟中對月書情

不識別家久但看明月暉關山一以鑒驛路遠相違影
落吳雲盡涼生楚樹微天邊有烏鵲思與共南飛

騎省

騎省慙三入鶯花過十春心徒懷許靖鬢已似安仁香
草思公子明珠報美人那堪秋水上猶此隔迷津

託宿報恩寺

平野新秋入長干舊寺存青蓮非世界綠竹是山門塔

火看生滅鐘聲悟靜喧迷方欲有問慙對遠公言

諸君乘月攜酒見過遲謝山人不至席上作

芳樹長安道春宵動旅愁一尊良讌會四海盡交遊玉
漏寒頻度金河靜不流清輝憐謝監何事隔南樓

寄子約弟

兩地承嚴竄同時罷省郎因書問舟楫何日下沅湘客
夢頻棲月征塗欲戒霜平生題賦意那得倦游梁

生朝寄兄弟

白髮逢初度清尊思惘然鵲鷁原上夢犬馬客中年眉
宇將雲結心旌共月懸朝來淇水望時問渡淮船

早春寄子約弟子方有悼亡之戚

獻歲思吾弟何時報徙官夢勞池上積書到洛中看太
史身猶滯潘生淚未乾梁園飛雪盡欲下剡溪難

送王亮卿遊天台

嶽路從茲始仙源信可求客情臨海嶠鄉語永嘉舟天
外看霞起林間聽瀑流無能解纓去送子欲神遊

九日寄子約

漫有登高興兼當望遠何對花驚白髮見鴈憶黃河亂
後書來少霜前木落多不堪羈宦日同是阻干戈

夢子安兄作

一為生死別獨宦尚飄蓬白首行荒外青山值亂中九
原人豈作萬里夢猶通今夜看春草池塘思不同

登天平廢寺

古寺空山裏重來感廢興尋谿迷蔓草攀壑藉危藤遠

樹多寒鵲然燈止病僧獨憐青嶂外猶見白雲層

與鄭司士夜話

故國經年別他鄉會面難人疑天外至花似夢中看
山瘴侵羶濕江流遶舍寒不知臺省客誰念一儒冠

七月六日張幼于館燕別將赴豫章

祖席叨君燕蕭齋與客過旱雲涼思少江月旅情多
著作慙金馬遲迴戀薜蘿欲知臨別恨來日視星河

由罨画溪登玉陽山院

溪水鏡中渡風帆畫裏看潭猶名玉女地即傍銅官向
夕山常雨先秋樹已寒洞霄供奉日歸隱聖恩寬

答徐紹卿見懷

停雲遙引望良晤近何疎以我丘中想開君湖上書花
飛人別後木落鴈來初祇為懷徐孺長令夜榻虛

何內翰招讌獲聞聲伎之盛

房中樂自舊京傳促柱輕調慢拂弦曲罷周郎那得顧
但聞餘響落燈前

皇甫濂

七首

濂字子約一字道隆嘉靖甲辰進士除工部主事謫河南布政理問稍遷興化同知有水部集

孫齊之云水部詩清瘦罕儷其志亦復玄曠

黃清甫云水部詩意玄詞雅律細調清長於造

景務在幽絕雖物指區中而神超象外會其獨

詣斯可與言詩矣 兄子循云子約詩每出間

曠彌覺冲逸興到詩成曾無造次應酬之語

宋轅文云子約盛有才名其詩頗傷浮急

詩話蔡子木哭子安詩云五字沉吟詩品絕一

官憔悴世塗難李于鱗送子循詩云吳下詩名

諸弟少天涯宦迹左遷多子約宦

亦不達與諸兄同詩稍不達也

赴洛留別華陽兄

浮雲薄高山，崇朝去還結。
游子不憚煩，悠悠復徂轍。
密親自茲曠，臨流何能發。
衰林動遠風，寒江冒輕雪。
遇物隆所悲，興愁頓難絕。
無以赴洛人，懷哉但吟越。

不赴郡檄荅子循兄

矯翮思霄翥，游鱗託淵沉。
物類各有適，殊塗難並尋。
豈伊世網慮，擾擾誰為心。
振衣還東山，寢迹棲舊林。
江海多風濤，舟楫弭川陰。
無令衝波激，但恐歲序侵。
願言謝

西府谷口有徽音

陳卧子云
固是雅人

悼子乘

冥冥雨露集熙熙歲始更靈蠢各有化人理獨無生念
我泉下子一絕如朝榮生男以待終胡為邁夭瘳清塵
布虛室寒晦凝軒屏流目無存影涕淚交霑纓恫懷何
能已歎息每遺聲堂闈曠綦跡詩書空復盈奚但腸九
迴心膂成頽崩媿乏延陵達無乃傷我明

昌平登陽翠嶺望居庸

漁陽通古北上谷邇皇州縣山帶西日重關枕滄流澄
霞澗影分歸雲嵐氣收陰厓忽成晦夏色驚先秋無以
行邁心恤此烽煙愁伊昔布駿略婉矣幕中籌匪今重
俠士自古并與幽傷哉投筆懷白首何所求

從僧簡經說難

少乏經世姿長逢行路迫何為百歲間坐使千慮積薄
從沙門游聊與同所適風遠水木華雲興梵鐘夕委叩
愛良託空情藉深譯曾是投石心對爾翻經席迺協支

許懷焉貴軒冕客初服儻有期永願庶可畢

歲暮

季冬違淑候但見玄陰結物化各以時胡能隆所缺潛
深有神鱗鳴條感微蛻霜雪塗我庭何由吐芳茁諒此
達化先匪伊明且哲

送子循家兄赴嚴相公召修志袁州

江水去悠悠征帆不可留一尊相送盡千里共含愁雲
樹依殘日霜笳動早秋猶憐覽風物書記在袁州

馮惟健 二首

惟健字汝強臨朐人嘉靖戊子舉人有治泉集

朱中立云陂門奇思駿發古選冲逸近體嚴整蓋傑作也

登觀音寺

天削孤峰峻醫閭最上頭窮巖藏古寺懸石結危樓雪瀑千林潤松門六月秋夜來禪榻卧天漢掌中流

姑孰道中

煙起樹色暝水生江岸仄夜來別故人風雨最蕭瑟

馮惟敏 四首

惟敏字汝行惟健弟嘉靖中舉人謁選涑水知

縣改鎮江儒學教授遷保定通判有海浮集 朱中

立云海浮詞雖逸而氣弱律雖協而調卑
元美云馮汝行如幽州馬客雖見伉俪殊乏都
雅

七里溪別墅 二首

知足始遠辱至人貴自全不羨公與侯所志受一廛吾
家有舊業乃在城東偏一丘藏一壑宛轉依清川生涯

故不常中道成棄捐棄捐從此去一去二十年非無五畝宅在邑多糾纏幸茲協初心歸我汶陽田

我田無遠近處處緣澄溪朝發巨洋許暮泊野水棲野航流北陸香稻來東齊豈伊貴異穀美利貽烝黎名山近村落迨暇恒攀躋仰瞻霄漢遙俯眺浮雲低翩翩比翼鳥乃在太行西終歲不合并激昂飛且啼

詩話臨朐治源山水勝絕高梧一林脩竹萬个泉流其中鄺善長所云分沙漏石者也土人謂園是海浮所築縹馬林間想見東山絲竹之盛後游莫再恒縈於懷讀先生二詩猶不禁神往

東郭次甫

送子游東岳五月渡長淮誰言獨往人

次甫自號獨往也

中道

臨當垂乘流豈不返因以安予懷一諾重平生三年今
始諧心期在山水所貴敦朋儕秋日動遐思良夜聞高
齋螢火照裳衣蟋蟀鳴庭階何時披素襟一笑遺形骸

石頭城有懷

石頭城畔枕寒潮坐聽疎更夜寂寥生計已拚尋舊隱
窮年猶自滯歸橈空悲浪迹淹三楚無復傷心問六朝

稷下故人知健否何時散步汶陽橋

馮惟訥 五首

惟訥字汝言惟健季弟嘉靖戊戌進士歷官江
西左布政使以病請老特進光祿寺卿致仕有

光祿集

朱中立云少州詩俊逸秀麗縱橫繩墨
間 王元美云馮汝言如晉人評會稽

王有遠體而無遠神 余世用

云光祿詩冲雅和平取則開寶

詩話光祿詩亦華整可觀三

馮並稱其賈氏之偉節乎

吳郎坐見人餉衣香戲贈

湘君寧薜荔魏帝采薜蘿盤龍連理帶翠鳳合懽襦不
能機上織學作府中趨定知香十里終然傾五都

朱近修云

六朝
遺響

春初玉泉觀餞別史子

地擁秦亭北天臨渭水南樓臺千嶂起雲樹萬家涵塵
劫何年盡仙宮此日探春光正可惜願一駐征驂

送龔侍御清戎滇貴

天王按劍欲專征詔使分麾十道行玉璽夜開鵠鵲觀

樓船春下鳳皇城日南島嶼揚旂度徼外蠻司擁傳迎
不用軍書馳朔漠年來百粵未休兵

秋日寄懷家兄

燕山木落鴈來遲遠客南歸未有期明月雙懸江海淚
秋風一寄鵲鴿詩淹留賈誼才無敵漂泊馮唐鬢欲絲
最是昭王遺恨處黃金臺上草離離

秋日同參伯邵公遊鳳皇山

鳳皇高閣俯晴空萬里蠶叢此路通遠近村原秋色裏

參差草樹夕陽中
尊前舞袖翻霜葉
天外清笳咽塞鴻
回首舊游成夢隔
獨將遲暮歎征蓬

卜大同 二首

大同字吉夫秀水人嘉靖戊戌進士授刑部主
事歷官福建按察副使有監泉集

同戴前峰遊赤壁

共有探幽興言尋赤壁遊
昔賢不可作吾輩復相求
孤鶴今何在長江漫自流
因之重懷古對此且淹留

楚中思歸

久欲辭塵網拂衣返故廬水田原不薄茅屋亦堪居五
斗何為者三湘安所如勾留猶未去豈羨武昌魚

卜大有 一首

大有字謙夫嘉靖丁未進士除知無錫縣調潛
山遷南禮部主事終尋甸知府有益泉詩橐

秋日游牛首奉和賓巖韻

黃菊枝頭未破叢曉臨蕭寺野煙空九江波浪開天塹

六代繁華想帝宮
醉後幾吟豪士賦
興來直上最高峰
日斜徙倚朱闌遍
縹緲孤雲是越中

卜大順一首

大順字信夫嘉靖癸丑進士除知當塗縣入為
刑部主事改吏部歷稽勲司郎中有簠泉集

鄧尉探梅

日斜游倦宿湖干
一望苔枝湧翠巒
午夜月明涼似水
船頭獨坐不知寒

詩話三卜同懷取甲第仕俱不達而子姓至今猶保其故廬其後岳氏繼起雖臻膺仕而後嗣凋謝日甚矣謙夫頗好事著述多有刊行者予既錄三馮詩爰以三卜先生作附於後

侯一元

五首

一元字舜舉樂清人嘉靖戊戌進士累官河南布政使有二谷集

詩話二谷詩雖

率易然有真趣

荅鄭越山

故人情不怡貽我書一尺云從去年秋及此春半夕恒

雨失時暘有背不得炙西山薇苦艱東郭履無迹徒吟
無正詩詎有救時策君問調元人尹去陟亦斥負鼎元
自肥豈知天下瘠冰山頊已頽皎日方待赫天子正更
絃羣公各虛席谷口沉子真東山卧安石守道詎憂貧
弗損自成益世事如格五人生不盈百念我七十翁當
為幾時客

書扇贈王少華

古人有遺言惟白可受采齊紈變蟬雀昭質復安在願

持君子心如月初離海太空無纖翳渾白終不改四海
揚仁風蒼生良有待

看新歷有感

少日見星歷每自閱紀年常常在人後漸漸出其前壯
志輕遠道久為車牛牽曾未幾何時歲月忽我遷一朝
見新歷我辰不及編元雖貞下起所惜非故躔不知義
和馭何日還來旋在天無停晷在地無停川吾生良已
矣來者其勉旃

舟次感懷

江城久客鬢垂絲故國長年入夢思
老大總非童穉日川原猶是釣游時
笛中朋舊今誰在鏡裏衰顏轉自疑
安得相隨慶禽侶雲山采藥任吾之

甲戌七夕作是歲予有悼亡之感

靈匹經年悵已違佳期此夕儼相依
悲歡轉首成陳迹明日橋邊鵲又飛

侯一簪一首

一簪字舜昭一元弟有龍門集

競渡曲

遠水浮雲不見天
画橈處處旋龍船
誰家少婦輕回首
忘却臨流墮翠鈿

栗應麟 二首

應麟字仁甫長治人嘉靖己丑進士陳州知州
歷按察僉事有去陳集

雨夜泊舟天津答劉笏山民部時駕幸承天

急雨危檣夜孤舟
溟海涯風濤驚宦轍
雲漢憶仙槎
故國含情遠殘燈照影斜
翠華在天末遷客敢言家

興武營暮春感懷

邊雲漠漠點征衣
飲馬長城悵未歸
春色不堪愁裏盡
楊花又向客中飛

栗應宏一首

應宏字道甫舉人有山居詩集

游城南池

偶下南山岑蕭然諧夙心漳干一徑入煙景四圍深秋
水浸枯木夕陽明遠林相期杳難即漁浦晚沉沉

高岱 四首

岱字伯宗鍾祥人嘉靖庚戌進士除刑部主事

出為景府長史有居鄆西曹集

李伯承云伯宗擬古諸詩雖文

通不能過

蔣春甫云長史詩直與盛唐岑杜

頡頏

冒伯魯云伯宗富才勁力與七子爭道

而馳

感興 二首

天員不中規地方不中矩人生天地間安得無齟齬仲
尼屢放逐顏回苦貧窶賢哲不偶時古今那可數達士
貴樂天仁人亦安土勉哉宣令德庶以表千古

鴻鴈萬里來翩翩渡彭蠡海燕去何之秋風辭故壘去
亦不足悲來亦不足喜物性各有適景光一何駛運至
疇不興時過亦云止世事俱茫茫靜坐觀無始

登臺

薊北收兵未長安無使來風塵連朔漠雨雪暗蓬萊去

鳥為誰急寒花何意開孤臣頭白盡倚杖獨登臺

寄懷李師孟水曹

別署秋光滿千帆霽色開海風吹月上江雨帶潮來名
著山公啓詩傳水部才不知登眺處誰與共銜杯

高啓一首

啓字叔崇嘉靖丙辰進士官兵部郎中有遺臺
山行

欲訪山中人未識山中路茅屋漏疎林蒼蒼但烟霧

何良俊 二首

良俊字元朗松江華亭人由歲貢生授南京翰

林院孔目有清森閣集

皇甫子循云吾鄉文徵仲以推擇待詔金門後

十餘年而蔡九達繼為南孔目又二十餘年而何君繼之杜甫草堂開於潭水羅舍精舍寄之江濱狎梵僧以幽探結勝流而觴詠每

一篇出匪但藝苑翁推抑且問閭遞誦

詩話元朗早歲入南都隨顧東橋游讌多習舊聞東橋每宴集輒用教坊樂以箏琶侑觴當康陵南巡日樂工頓仁隨駕至北京得金元人雜劇元朗妙解音律令家中小鬟盡傳之置酒留賓恒自度曲有李節者善箏歌元朗品為教坊第一於時名彥咸賦詩留贈黃淳父詩所云十

四樓中第一聲也其後引歸海上倭亂避地青溪旋徙吳門然文酒之會未嘗廢絲竹也詩頗率意其買宅句云一須焦革鄰舍二要秦青對門興同自豪第垂好樂無荒之義矣

春日寓懷

東方雖大隱終是漢庭臣如何敢恣肆嘲哂萬乘尊武帝本愛才寵賜亦殊倫百金買少婦終歲輒易人侍從匪孤遠諷說恒見親當時非不遇傲兀竟何因我今六尺軀頭白久沈淪始圖佐明時一官終為貧比肩侏儒笑爭食雞鶩嗔放身鹿豕場終勝金馬門若非速謝去

孤意何由申

包大侍御冬日過余城館見貽新詩率爾奉酬

弱年慕大隱中歲棲附郭試以愜微尚兼用諧勝託環
堵有舊營山楹無改鑿高樹列偃蹇羣峰羅峩嶸輕颺
披葯房微雨灑菌閣新竹漸紫苞繇花吐芳萼春歸競
敷榮秋至同孤落林卧閱代謝天游恣寥廓遺形偶斥
鷄混迹隨屈蠖豈無寰市喧幸免纓組縛畢歲矢勿諼
中懷諒無忤包子臺中彥風期眇丘壑暇日訪衡茅投

我游園作委曲陶令言纏繇尚平約丈夫貴得意乘時
展明略勉終天上期庶果林中諾

何良傳 二首

良傳字叔皮嘉靖辛丑進士官禮部郎中有禮

部集

許仲昭云叔皮詩舒徐暢達譬之洪流行地波瀾自生品卉在林采色各具 徐伯

臣云叔皮五言視漢人稍加藻績然渾成和厚可稱作者七言歌詞得激歎流美之致律亦蘊

藉可讀

贈徐伯臣補奉化令

嚴程忽云屆將子臨河橋弱柳向微風黃鳥時交交感
物傷余心申爾以久要雖有盈尊酒何以永今朝徘徊
意不極揮淚發長謠

董子元移居

南郭寡塵鞅東林有勝名青山斜枕市綠水曲依城夜
月家家笛春風樹樹鶯結廬心自遠寧復世人情

金大車 一首

大車字子有其先西域密嘉國人明初歸義賜

姓居南京中嘉靖乙酉鄉試有方山遺豪

陳羽伯云

子有詩學襄陽

隨州辭義兼美

送汪汝玉守思南

謫宦君何恨高名世所傳殊方原鬼國瘴水積蠻烟十
口天邊寄孤帆灘上懸中原萬餘里後會定何年

金大輿 二首

大輿字子坤諸生有集

陳羽伯云子坤詩清新秀朗

中秋夜集

金素動四野佳氣集林塘中天圓景來冉冉揚清光芳
池含微波流螢曜中堂良覲侈高會促席飛華觴絲竹
間哀響雲霞乍低昂人生宇宙中歡宴不可常名園秀
且麗秋夜清且長醉歌淹永夕清光未遽央

與文源朱二過溧陽道上

侵星發徂輶悠悠即長路家人前致詞問我將焉赴躬
耕苦旱乾何以資朝暮衣食事奔走晨寒犯霜露楓林
號夜烏宿草棲寒兔輕烟動墟里崩沙依淺渡悽悽浮

客心黯黯長天霧
逍遙思孔桴
濩落嗟莊瓠
去去返蓬蒿
脫粟安吾素

文彭一首

彭字壽承長洲人
待詔徵明伯子
由歲貢生仕為國子監博士

詩話二文翰墨無忝衡山詩雖流傳不多以比彭陸居周固當較勝

題溪南別業

西溪溪水深不流
溪南更築林堂幽
會心自有濠濮想

乘興不數山陰舟一簾暮雨足吟眺萬疊春山作卧遊
主人縱有蒼生寄清夢依然狎白鷗

文嘉

四首

嘉字休承徵明次子由歲貢生官和州學正

天池

天池之山今始到仰首忽見蓮花峰池水潺湲瀉琴筑
石壁截崖開芙蓉春疇連延麥初熟暮嶺迴合烟已重
肩輿催予下山去悔不此地巢雲松

石湖

鷓鴣鵲鷓滿晴沙紅杏夭桃亂著花十里湖山開畫障
一雙小艇載琵琶

題畫

二首

清絕倪迂未易攀能將水墨繼荆關疎林斜日茅亭外
一片江南雨後山

沉香烟暖碧牕紗綠柳陰分夏日斜夢覺只聞鈴索響
不知山鳥啄枇杷

蘇 濂 二首

濂字子川濮州人鴻臚署丞終府通判

青石嶺

鳥道盤雲細羊腸度坂危青迴峰歷亂丹轉磴逶迤飲
澗後相掛懸厓樹倒垂平生愛山水此地足棲遲

絕句

新笋抽林與屋齊紅飛過画闌西流鶯定惜春將去
坐向綠陰深處啼

蘇澹二首

澹字子冲舉人有蘇仲子集

鹽河聞鴈

客子起常早月明殊可親
一聲沙際鴈匹馬渡頭人
顧侶鳴偏切悲秋興轉真
蘭閨夢迴處應憶客邊身

暮秋夜宿紫荆關

驛路飄黃葉關門薄紫荆
上都瞻處近北斗坐來平
塞冷秋笳斷原荒野燒明
終軍雖老大還欲請長纓

蘇 潢 一首

潢號杏石官王府審理

寫蘭寄王湘雲

幽蘭兩三花寫在齊紈扇寄語女校書秋來心莫變

張鳳翼 五首

鳳翼字伯起長洲人嘉靖甲子舉人有處寶堂

集

詩話伯起好填詞梨園子弟多演之然俗筆耳
其弟叔昭詩亦庸庸惟幼于小有才然亦頗情

自放而吳人之諺比於四皇
甫論其工拙判若雲淵矣

養蠶曲

曉露沾我襦採桑過南陌葉少不盈筐蠶饑妾行迫蠶
眠妾不眠絲成供夜織勞苦有如此方能成匹帛奈何
衣帛人翦裁不復惜

西苑志感

芙蓉別殿未央西爐氣晨飄雉尾齊出洛神龜將寶錄
銜花馴鹿遶金閨近臣拾翠供玄草使者乘驄訪碧雞

一自六龍天上去幾回清禁改璇題

蟬

抱葉微沾露臨風響遏雲偶然鳴木末非欲使人聞

竹枝詞

妾從湘江歸君向湘江宿欲識淚痕多請看湘江竹

暮春感懷

野花開遍又殘春買權攜尊好及晨待得向平昏嫁畢
青山應笑白頭人

張獻翼一首

獻翼字幼于更名救國子監生有文起堂正續

集

魏仲嘉云幼于資鑒超敏標峰朗逸與兄伯起婉章新藻齊芬互映

劉子威云幼于詮

詞清麗體舒興遠故能聲傾一時標映多士

詩話幼于早擅才名見賞於文徵仲讀書上方山治平寺中撰周易約說雜說臆說及讀易紀聞讀易韻考不失為儒生後乃狂易自肆與所善張孝資檢點故藉剌取古人越禮任誕之事排目分類仿而行之兩人為儔侶或歌或哭或紫衣挾伎或白足行乞孝資生日自為尸幼于率子弟總麻環哭上食設奠孝資坐而饗之翼日行卒哭禮設妓樂哭罷痛飲謂之收淚又有

劉會卿典衣買歌者俄而病卒幼于持絮酒就其喪所哭之以詩復令會卿所狎胡姬為尸仍設雙俑夾侍作使伶人奏琵琶再作長歌酹焉其放浪亦甚矣晚攜妓居荒園中為盜所殺詩乘興會捷書無暇持擇

七夕同趙今燕賦

翠帳紅妝送客亭佳人眉黛遠山青
試從天上看河漢
今夜應無織女星

張燕翼 一首

燕翼字叔貽嘉靖甲子舉人

送仲氏之南都

鵲原惜別思依依
洛下憑誰薦陸機
池上夢隨芳草去
江干心逐片帆飛
愁添旅食頻彈鋏
葉落空園靜掩扉
欲識倚門情更切
白雲回首是庭幃

明詩綜卷五十

謹案第一頁後六行諳達舊作俺達今改後倣此
三十八頁前八行密嘉舊作默伽今改



總校官庶吉士

臣

張能照

校對官檢討

臣

盧應

謄錄監生

臣

魏廷勲